

philippine studies

Ateneo de Manila University • Loyola Heights, Quezon City • 1108 Philippines

Lalim

Jaime Jesus U. Borlagdan

Philippine Studies vol. 53, no. 2&3 (2005): 365–366

Copyright © Ateneo de Manila University

Philippine Studies is published by the Ateneo de Manila University. Contents may not be copied or sent via email or other means to multiple sites and posted to a listserv without the copyright holder's written permission. Users may download and print articles for individual, noncommercial use only. However, unless prior permission has been obtained, you may not download an entire issue of a journal, or download multiple copies of articles.

Please contact the publisher for any further use of this work at philstudies@admu.edu.ph.

<http://www.philippinestudies.net>
Fri June 27 13:30:20 2008

JAIME JESUS U. BORLAGDAN**Lalim**

Sapagkat di tulad ng hanging
madaling mahagilap,
kailangan lang ng tubig na matagpuan.
Hahanapin sa malililim na liblib,
madalas sa matatalas na batuhan.
Hindi halimaw subalit kailangang paamuin,
malimit dapat gulatin para mahuli.
Dahil maagaw man
mula sa pananaginip ang paghimbing
at maagaw mula sa pag-ibig
ang ulirat ng tubig,
ilalayo ang kamay sa init,
daragdagan ang lalim, susuot sa singit,
sa dilim itutuloy ang pag-awit.

At kung ang awit
ng tubig ay maririnig,
di tulad ng awit ng lupa o apoy,
kundi ang bigat na naiiwan sa damuhan
pagkalipas umawit ang hangin.
Awit ng tubig ang lagablab ng estrelya
pagkaluwal mula sa malagim na awit ng lupa,
ang sariling pagkasupil ng mapanirang apoy
ay awit ng tubig.

Kung ayaw magpakita ang mapanlarong hangin
nakakasakit naman ang pang-aakit ng apoy,
tapat ang pangako ng lupa,
lamang sa matatabang sinapupunan.
At di ba't ang maibibigay lang ng tubig
ay ang sarili mo
hindi sa piling niya
kundi sa duyan ng iyong mundo?

Dahil, matatagpuan na itong umiibig,
malayo ka pa man
may pagdiriwang na ang pag-agos
sa iyong pagdating.
Nakatali na sa kinalalagyan
ng paghihintay.

Nag-iisa
at umiibig

sa tuktok ng bundok

kung saan malapit sa tainga ng diyos
kung saan malayo sa mga nilalang
na nabigyan ng paglipad.

Kahit magdamag, kung pagsuyo
sa mga bituin, ay di gagalaw. Sa ibabaw,
ay isang debotong

salamin ng panatag
na pagpapaalipin.

Ngunit sa pusod, sa bansa
ng di nasabing luwad,
sa hantungan ng inakong
mga ibinato sa tubig,
malambot ang sayaw ng maputlang halaman.

Sa wakas, walang makikitang dalawang tubig
sa isang

panahon.

Hangga't kayang makisapi,
durugtong ang dalawang katahimikan
upang magbigay ng mas tahimik
na pananatili.